

gojgaeq ndawbiengz

Bohhoj Suenq Yahdaiq

卜伙算计丈母娘

□Luz Yuzgangh soucomz/陆如刚 收集

Bohhoj lix iq couh guh lwggyax, aenvih ranz hojndoq, baenzranz le youh mbouj miz saek boux lwgnyez, ndigah vunz heuh de guh ‘Bohhoj’. Mboujgvaq Bohhoj cei mbouj fug vunz naeuz “Vunz gungz cikeiq noix” coenz vah neix, aenvih de dwg bouxvunz cinglingz youh coengmingz he.

Ranz yahdaiq Bohhoj dwg ranz fouqmiz, caeuq Bohhoj dangq mbanj, yahdaiq dwg yahmaetmi gyae’ gyawj mizmingz he. De miz sam dah lwg, aenvih dahdaih dwg vunzhuk cijndei haq hawj Bohhoj; dahngeih caeuq dahsam haq hawj ranzmiz guh bawx; Daegseiq dwg lwgsaidog, aenvih bohmeih ndiepgyaez gvaqbouh, baenz mbauq le lij caengz rox swiq vanj.

Yahmaetmi soqlaiz mbouj dawz lwg gwizhoj neix yawj hwnj gumzda, hai bak haep bak ndaq de dwg ‘lwgcuij’. Vih ok gaemzheiq ndaw aek, Bohhoj hix ra gihvei daeuj sousib Yahmaetmi neix.

Caj bae caj dauq, gihvei daengz lo. Miz baez he, Yahmaetmi youq henz saeuq saz maenz, foedfwd yawjraen Bohhoj daj baihyae byaij daeuj, gipmuengz daj ndaw saeuq saiq aen maenz okdaeuj diem youq lajeiq, danghyenz lo, gij dinfwngz de vaij mbouj gvaq lwgda Bohhoj.

Bohhoj baez yamq haeuj douranzsaeuq couh cang guh ndatcingz yienghceij yungh rengz gotdawz yahdaiq, lij unqswnh naeuz dwk: “Meh ha Meh! Baenz nanz mbouj raen ndangdae mwnghz lij ndei ba!”

Yahdaiq ngaiz aen maenz ndat lajeiq nanzsauh daengz raemxda conhmyabmyab, hoeng youh mbouj

gamj oksing, caen dwg saej humz mbouj rox gaeu lo, Bohhoj cix roxnyinh biuhhoz dangqmaz, caegcaeg riu dauqndaw.

Caiq miz baez he, Yahmaetmi youq ranz guh ceiz, guh sat ngamq yaek cimz haeuj bak youh myaebraen Bohhoj daj rog byaij daeuj, de sikhaek dawz ndoengi ceiz diem haeuj laj moeg bae, ndaeng Bohhoj dwg ndaeng moednding, gij heiqhom ceiz byawz deuz ndaej gvaq congghndaeng de ne! Bohhoj sikhaek rox Yahmaetmi diem ceiz haeuj gyawz bae. De angq dwk doiq yahdaiq naeuz: “Meh ha, haxbaenh gou youq byonghroen raen duzmax he rouxringx, ndeiyaew raixcaix! Mwnghz yawj! Duzde dwg baenzneix ringx ne!” Gangj sat, lij guh lumj lwgnyez nei ringx youq gwnz moeg. Rouxringx sat le lij doiq Yahdaiq naeuz: “Laj moeg dwg miz yienghlawz denz ndaej baenz unq ne!” Doq gangj doq fan geu moeg, raen ndoengi ceiz ngaiz at myaz liux, gyajcang naeuz: “Hojsik ha! Hojsik ha!” Yahdaiq cix youh heiq youh gip, daej riu cungj mbouj baenz.

Yahdaiq ngaiz sied song baez hawj gwizhoj danghyenz mbouj fug, lwnz daengz de amq heiq gax aek, cungj siengj ra ngoenz daeuj bauqcouz doxdauq.

Ndwenlab lajcieng, Daegseiq aeu yah lo, ngoenzvahcuz haenx song boux lwggwiz fouqmiz dangq boux gwih max dawz huqlaex naek daeuj gingqhoh. Yahdaiq daegdaengq anbaiz songde naengh congzsang daihdangz gwn caeuz, gwnzcongzbaij rim noh’ aek nohgau; Yahmaetmi raen Bohhoj huqlaex mbaeu, anbaiz de youq rog

naengh congzdaemq caeuq gyoengq laeujbat caemh gwn, gwnzcongzbaij dwg nyaujbit nyaujgaeq couh dwg ndokndag, ra gaiq soengq haeux hix nanz ne. Gwn caeuz sat le, Yahmaetmi youh caiq daengq Bohhoj naeuz: “Lajcieng caeg lai, vih fuengz vunz daeuj guhcaeg, mwnghz youq lajroq nanz, hix mbouj ndaej nanz gvaqbouh nw!”

Hwnzde song lwggwiz fouqmiz caemh nanz aen mbonq he, Bohhoj hix gienj fan moeg gaeuq he saenzdedded nanz lajroq, ndwenlab mbwn nit Bohhoj baenzlawz nanz ndaej ndaek. Gyanghwnz laeuj sanq gvaq byongh, Bohhoj yied naemj yied hozndat: Yahmaetmi neix dama yawj vunz daemq, yawj gou baenzlawz


sousib sou cix ndaej ne!

Byonghhwnz samgeng, Bohhoj laeglemx dawz riengmax doxcug, song duz max vihneix youh dik youh hemq mbouj dingz, nauh dwk gyoengqde mbouj miz banhfap nanz. Yahdaiq youq laj moeg ndaq naeuz: “Lwgcuij neix mwnghz mbouj rwz nuk ba! Duzmax baenzneix dik nauh mwnghz mbouj dingqny? Dawz song duz de faen hai ha!”

Bohhoj han naeuz: “Gou dwg vunzseng haeuj gyawj mbouj ndaej! Hawj bouxcawj de daeuj gek hai cix ndaej ne!”

Song lwggwiz byonghhwnz ngaiz yahdaiq heuh bae gek max gig mbouj cingznyiengh. Bohhoj baez raen songde ok rog daeuj yien max, gipmuengz ndonj haeuj ndaw rug bae biengj fan moeg le caiq ok gong nyoh he roengz ndaw mbonq bae, youh aeu moeg hoemq doxdauq. Song lwggwiz byaij dauq raen gwnz mbonq cungj dwg dumz nyoh, cungj lai hix dwg mwnghz nyoh conh doxda hwnjdaej, boux mbouj nyiengh boux, Yahdaiq youq henz cam naeuz: “Guhmaz baenzneix cauz ne?” Bohhoj daihsing dap naeuz: “Song boux de nyoh conh ndaw mbonq ne!”

(caengz sat)



Vunz Gaenx Cin Daeuj Romh

Veiz Gozcingh Sangcieng Cawj-guenj Guengjsae Ngeihcib Bi

韦国清上将主政广西二十年

□Hoz Saubangj sij Cinz Siengzcouh Liuz Gingliuj Cinz Siengzgen hoiz

Ndwen 2 ngoenz 13, de daiq vunzhong henzndang de bae daengz Swcigih Linzyez Gohyoz Yenzgiusoj, dingq conghyah gaisau gij cingzgvang gak cungj gofaex majhung caeuq gij yigen doiq loegvaq Guengjsae haenx.

Veiz Gozcingh gaem hong Guengjsae cauh ndoeng loegvaq, lij ndaej Couh Wnhlaiz cunglij haenh gvaq.

Vahsug naeuz: “Cib bi baenz faex”. Byaij haeuj 80 nienzdaih, Namzningz Si caeuq gij dieghenz de, langhda yawj gvaqbae gizgiz saekheu doh da, mwncupcup, heuswdswd, lai baez ndaej Guekgya Loegvaq Veijyenzvei haenhndei dajciengj, doeklaeng youh ndaej Guekgya Gensezbu ndamingz guh “Aensingz Senhcin Loegvaq Daengx Guek”, “Aensingz Suenfaex Guekgya”. Mbangj canghraiz haenh Namzningz guh “saencingz saekheu”, “aencaw saekheu”, “faexheu buenq singz laeuz buenq singz”; mbangj gicej

ngamq daengz Namzningz haenx, goj haenhdanq: Daengz Namzningz “ndaej yawjraen aen singz heuswdswd ndeu”, “heu doh gwnzbiengz, simsoeng raixcaix!”

Gveilnz, Liujcouh, Vuzcouh sam aen singz neix guh loegvaq, geij boux goengdaeuz faengoeng haenx gaem ndaej gig gaenj, gingciengz diemjcaz dukcoi caeuq sonyinx, yienghceij aensingz bienqvaq gig lai.

Mwh Veiz Gozcingh cawjguan j seizhaenx, caenhguenj ok gvaq gij saeh bi 1958 daih lienh gangdiet buqvaih ndoengfaex yiemzcungq neix,

hoeng aenvih doeklaeng Swcigih Dangjveij, Cwngfuj, itcig dangq cauh ndoeng loegvaq Guengjsae dwg gij hongrap canloz youqgaenj fazcanj gozminz ginghci caeuq baujhoh sevei vanzging haenx haenq ca mbouj cuengq, cingzcik yienhda. Ciuq gij shhliu diuhcaz swhyenz ndoengfaex Guengjsae, Guengjsae ngamq gaijfang seizde, dieg miz faex miz 5685 fanh moux, lienghrom ndoengfaex miz 16549 fanh laebfuengmaex, gij lwdhoemq ndoengfaex dwg 16.04%; bi 1974, dieg miz faex gvangq 8266.05 fanh moux, lienghrom

ndoengfaex dwg 19261 fanh laebfuengmaex, gij lwdhoemq ndoengfaex dwg 23.32%.

Bi 1978 swcigih laebbaenz 20 hopbi seiz, Veiz Gozcingh guh boux donzcangj aen duenzdaibyauij cunghyangh ndeu ma daengz Guengjsae camgya hozdung angqhoh, youh bin hwnj aen bauqdaiz Lwgminz Gunghyenz bae ngonz baez dem, seiqhenz Namzningz heuhswdswd, caiq mbouj ndaej raen namhhenj lo. De angq naeuz: “Namzningz Si loegvaq guh ndaej mbouj loek.”

(caengz sat)